

ত্রিপুরা সরকার
তথ্য ও সংস্কৃতি অধিকার

স-৩২৩৯

আগরতলা, ১৫ অক্টোবর, ২০২৫

**রাষ্ট্রীয় বাল স্বাস্থ্য কার্যক্রমে
স্বাস্থ্য স্ক্রিনিং অভিযান সম্পন্ন**

শিশুদের স্বাস্থ্য সুরক্ষায় অঙ্গীকারবদ্ধ রাষ্ট্রীয় বাল স্বাস্থ্য কার্যক্রম এর ধলাই জেলার কমলপুর মোবাইল স্বাস্থ্য দল সেপ্টেম্বর মাসে এক সফল স্বাস্থ্য স্ক্রিনিং অভিযান সম্পন্ন করেছে। ০ থেকে ১৮ বছর বয়সী শিশুদের মধ্যে জন্মগত ত্রুটি, অপুষ্টি, রোগ এবং বিকাশের বিলম্ব (4 'D's) শনাক্ত করে বিনামূল্যে চিকিৎসা নিশ্চিত করাই ছিল এই অভিযানের প্রধান লক্ষ্য। মাসব্যাপী এই নিবিড় কর্মসূচির মাধ্যমে কমলপুর এলাকার বহু শিশু স্বাস্থ্য পরিষেবার আওতায় এসেছে।

কমলপুর RBSK দল স্থানীয় প্রশাসন ও স্বাস্থ্যকর্মীদের সহযোগিতায় মোট ৩টি স্কুলে ২৪৭জন এবং ৩৪টি অঙ্গনওয়াড়ি কেন্দ্রে ৮৩৬ জন শিশুর স্ক্রিনিং করা হয়। এই ব্যাপক প্রচারের ফলস্বরূপ মোট ১,০৮৩ জন শিশুর সম্পূর্ণ স্বাস্থ্য পরীক্ষা করা হয়েছে।

এই স্ক্রিনিং অভিযানের সবচেয়ে গুরুত্বপূর্ণ দিকটি হলো দ্রুত রোগ শনাক্তকরণ এবং চিকিৎসার জন্য রেফার করার ক্ষেত্রে শতভাগ সফলতা। স্ক্রিনিং শেষে মোট ১০১ জন শিশুর বিভিন্ন স্বাস্থ্যগত সমস্যা চিহ্নিত করা হয়। এই সমস্যাগুলির মধ্যে রয়েছে দৃষ্টি ও শ্রবণ ত্রুটি, অপুষ্টিজনিত সমস্যা, সাধারণ রোগ এবং কিছু জন্মগত ত্রুটি। অর্থাৎ, চিহ্নিত হওয়ার সঙ্গে সঙ্গেই তাদের উন্নতর চিকিৎসার জন্য জেলার প্রাথমিক স্বাস্থ্যকেন্দ্র অথবা হাসপাতালে পাঠানো হয়েছে। এটি নিশ্চিত করে যে কোনো শিশু যেন চিকিৎসার অভাবে না থাকে।

শিশুর জন্মলগ্ন থেকেই স্বাস্থ্য নিশ্চিত করতে, RBSK দল প্রাথমিক স্বাস্থ্য কেন্দ্র এবং মহকুমা হাসপাতাল এর মতো ডেলিভারি পয়েন্টেও নবজাতকের স্ক্রিনিং করেছে। এই মাসে মোট ২৪ জন নবজাতকের জন্মকালীন ত্রুটির জন্য স্ক্রিনিং করা হয়েছে। প্রাথমিক পর্যায়ে জন্মগত ত্রুটি চিহ্নিত করার ফলে চিকিৎসার মাধ্যমে শিশুর জীবন উন্নত করার সুযোগ সৃষ্টি হয়। এই কর্মসূচি কেবল রোগ শনাক্তকরণ নয়, বরং শিশুদের জন্য একটি সুস্থ ও উন্নত ভবিষ্যতের ভিত্তি তৈরি করেছে। স্বাস্থ্য দপ্তর থেকে এক প্রেস রিলিজে এই সংবাদ জানানো হয়েছে।
